



Kalaallit Nunaat tamakkerlugu nunaqarfiit ineriartortinneqarnissaannut ukioq 2050-imut pilersaarummik kingusinnerpaamik UKA 2027-mut suliaqarnissamut Naalakkersuisut peqquneqarnissaannik Inatsisartut aalajangiiffisassaattut siunnersuut. Pilersaarummi sullissinermut tunngaviusunut, attaveqaasersuutitut, inuussutissarsiornikkut periarfissanut pitsaasunillu ineqarnissamut naligiimmik periarfissaqarnissaq qitiutinneqassapput.

(Inatsisartunut ilaasortaq Kuno Fencker, Naleraq)

(Siullermeerneqarnera)

Inatsisartunut ilaasortaq Kuno Fencker qujanaq siunnersuummut.

Nunaqarfiit ataatsimut oqaluttuarisaanitsinnut kinaassutsitsinnullu pingaarutillit ilagaat. Tassani kulturput inooriaaserpullu tunngaveqarmat, aammalu ataatsimuussuserput tunngavippullu ilusilersorneqarsimallutik. Ataatsimuussuseq, ikijuerusussuseq pinngortitamullu qanissuseq pingaartitaapput tamarmik, nunaqarfinni inuunermiit naggueqartut. Taamaattumik pingaartuuvoq, nunaqarfiit isigijuassallugit siunissami inuiaqatigiinni ilaatittuarnissaat.

Aammali piviusoq qiviartariaqarparput. Ukiuni makkunani nunarsuarmi tamarmi nikeriartoqarpoq inuit illoqarfinnut nussorlutik. Ineriartorneq taanna aamma maani nunatsinni malugaarput, inuusuttorpassuit illoqarfinnut annernut nussortut ilinniarniarlutik, suliniarlutik periarfissagissaarnernullu nuukkumallutik. Ineriartorneq pissusissamisoortoq, imaannaanngitsunilli toqqaanissatsinnik inissiisoq. Oqimaatigiinneq nanisariaqarparput nunaqarfinni immikkuullarinneg pigiinnarumallugit, aammali qulakkeerlugu, nukiit atornerqarnissaat, innuttaasunut tamarmiusunut naleqarnerpaanut.

Tassungalu ilutigalugu pingaartuuvoq, ukkatarissallugu, inuusuttut nunaqarfinni siunissami periarfissaqaratik naparliinnannginnissaat. Ilinniartitaanerit, praktikkerfissat suliffissallu apeqqutaalluinnarput, inuusuttut kissaatigippassuk nunaqarfinniiginnarnissartik. Taamaattumik suliniutaasariaqarpoq siunissami, qanoq ililluta ilinniagaqarnissamut pitsaanerusumik periarfissiisinnanersugut, piffinni inuussutissarsiortunik tapersersuinissamut aammalu digitalimik periarfissat annertusarnissaat, aammattaaq nunaqarfiit inuusuttaminnut siunissami isumalimmik neqerooruteqarniassamata

Nunaqarfiit ineriartornissaannut piffissamut ungasinnerusumut pilersarusiornissamik siunnersuut eqqarsaammik pingaarutilimmik imaqarpoq. Suliniutip ataatsimoortup ersarinnerusumik takutissinnaavai unamminartut periarfissallu. Tunngaviusinnaassammat, uagut inuiaqatigiittut isummersinnaasugut, piviusunik aallaaveqarluta, aningaasaqarnermut, inuiaqatigiit agguataarnerinut inuuniarnikkullu atugaannut tunngassuteqartunut.



Suliarujussuuvorli, sukumiisumik piareersartarialik. Pilersaarut taamaattoq paasissutissanik ersarissunik, aningaasatigut naliliinernik piviusorpalaartunik aammalu kommuniniit, nunaqarfinniit sullissisuniillu susassaqtuniit amerlasuunit peqataatitsinernik tunngaveqassaaq. Unneqarissumik isummersornissamik pisariaqtitsivugut, qanoq ililluta pitsaanerpaamik nunaqarfinnik imminnut attassinnaasunik pilersitsisinnaanerluta.

Demokraatit nunaqarfiit siunissaasa nukittorsarnissaanik kissaateqarneq aammalu innuttaasut, sumiluunniit najugaqaralarunik, assigiimmik periarfissaqarnissaat isumaqatigaat.

Taamatut oqaaseqaateqarluta siunnersuut aammalu Naalakkersuisuniit allannguutissatut siunnersuut aappasaaniinnginnerani ataatsimiititaliami susassaqtumi suliareqqinneqarnissaa innersuussutigaagut.